

立法會退休保障事宜小組委員會公聽會：政府為長者提供的各項現金援助

政府搞年金重蹈歷史覆轍

製造市場化長糧消解社會保險

劉綺雲

女工合作社

2018年3月24日

女工合作社係來自基層的女性，有以前做製造業，而家轉做服務業嘅女工；有雙職婦女；亦有已經退休嘅基層文員。我地長期關心退休保障，因為係我地好切身嘅問題。

二十幾年前，政府原本話要搞社會保險式嘅老年退休金，但最後唔做，整咗個強積金俾我地，成日話打工仔供強積金，到退休時就可以攞番一筆錢養老。但事實上，好多人根本唔可以靠強積金維持退休生活。好似家庭主婦，好多家庭照顧者，同埋已經退休嘅長者，佢地無收入，退休點算好啊？基層工友人工低，強積金好少，就算取消了對沖，依然唔夠養老！我比較幸運，以前係公務員，做基層文職。而家退咗休，每個月有長俸，可以維持基本嘅生活。我認為所有人都應該享有類似我咁，有基本和固定收入嘅退休保障。

強積金表面上話幫打工仔儲錢，實際係益咗基金公司賺錢，仲要工人承受金融市場波動嘅風險，好無保障。但係政府未有汲取教訓，今年年中將推行嘅“公共年金”，重覆強積金嘅問題：將長者退休保障變成一個金融投資產品嘅選擇。至於買年金嘅風險、不能與通脹掛勾等問題，政府卻一直未有清楚交代。就算是由政府保證回報嘅公共年金，在動盪嘅金融市場仍需承受風險。

而為了吹谷公共年金，政府有可能會將年金嘅資產豁免在申請長者生活津貼嘅限制之外，變相令資產較為寬裕嘅長者亦可享有長生津。這既自打咀巴，混淆了政府一直聲稱嘅長生津嘅扶貧性質，更會不合理地增加公共財政開支。

政府不顧制度嘅矛盾和唔惜工本利誘中產長者參與年金計劃，難免令人感到是為了消弭爭取全民退保嘅力量！近年嘅爭取全民退保運動，使更多中產人士明白單靠自己嘅退休金未必能解決長壽風險問題，也因此更支持由社會不同階層之間互助共責嘅全民退休保障。

政府宣傳片不斷強調長者可用年金「自製長糧」，其實係用自己嘅積蓄解決自己嘅退休生活，繼續鞏固市場化嘅個人投資行為，分化中產與基層，消解強調社會

共同承擔及財富再分配的爭取社會保險的動能，如此政府便可以逃避承擔推行全民退休保障的責任。

女工合作社卻始終認為，祇有實施由勞資官三方供款，有經濟審查嘅全民養老金，每個月為退休長者提供一筆穩定嘅收入，類似公務員嘅長糧，先可以保障到大家嘅退休生活，不用憂柴憂米，死慳死抵，可以安心渡晚年，活得有尊嚴。而透過各階層互助共責解決退保問題，社會才有希望。